

fato principiar case 30 per li stratioti li a Saline a marina, quali guarderano dite Saline de merchadantia e contrabandi, e sarà di utilità e reputation molto. Scriveno, in li zorni passati el manchò di questa vita sier Vctor Capello sinicho, e lo laudano asai; il Signor Dio gli dia eterna quiete! Scriveno dubitar quella isola haverà sinistro di biave rispetto a la cavalleta et sechi sono stati; e se Idio non li manda qualche nevada non sano come passar; e si havessero trovato di far qualche vendeda, l'arebena fatta. Hanno fatto una provision a la cavalleta, che mai più è stà fatta la simile, sperano sarà di grande utilità, qual è che tutti li franchomati et altri habino ad asunar uno mozo di ovi de cavalleta per cadauno, li parici mezo mozo, la Signoria nostra et li feudatarii pagino di le sue intrade a rason di una per 100, et li apaltadori mezo per 100 per assunar et ruinar ditta cavalleta. Et zà ne è stà asunà moza 8 milia e più, et ogni ovo ne fa 40 e da là in suso. La qual provision è di summo contento a tutti, e vasse assunando in gran quantità. Scrive, lui Locotenente atende con li scrivani di la camera in far tirar tutti li debitori di la Signoria nostra in resto, et saldar quelli non dieno dar sopra uno libro ordinario, perchè erano in molti libri et per questo la Signoria ha perso molti danari. Molti è morti, quali aviano satisfato. E scrive aver trovato partide di più di anni 40 in qua. Da novo, la Soria è tutta pacificha, nè più si parla di guerra.

69 *Copia di la letera dil re Christianissimo scrive di sua mano a la illustrissima Madama sua madre in francese, et traduta in volgar.*

Madama, quel che mi ha guardà de scrivervi spesso, è stà che 'l non me pareva de non haver fato cosa che fusse degna de farvelo intender fino a questa hora. Gieri, madama, e fu a quatro lige del nostro alozamento, con quelli de la mia mason et la compagnia del meraschalcho de Chabanes, zoè monsignor de la Palisa, per visitar et far uno ponte su la riviera de Lescalt, . . . . et fu grossa scharamuza con quelli de la guarnison de Bochain; ma quando i vetino che al suo despetto el ponte se fazeva, tutte le zente de la compagnia del ditto Bochain se ritirano fuzando dretto a Valentiana. Hози sono passà a bon hora i nostri venturieri francesi e li svizzeri, et io son corso fin là, et là son stà advertido da la nostra guarda, ove giera et Baiardo et Memorsansin, che un grosso numero de zente da pe' et da cavallo giera ussidi de Valentiana; la qual cosa ve-

dando, son andà là con li svizari, li qual se son ordenà in bataia, cussì i nostri aventurieri e tutte le zente d' arme di l' antiguarda et quelli di la bataia, et havemo caminado dreto là dove i nostro nimici i erano, li quali comenzono a salutar la nostra guardia; e voria, madama, che 'l fusse stà possibile che vui havesse podesto veder el bello e bon ordene in el qual nui caminavamo. Nui havemo subito da poi discoveredo tutta la posanza di nostri nimisi, che i erano in zereha da vinti a vintiquattro milia homeni da piedi e in zereha cinque milia cavali, in el più bel pian che è posibel da veder. Nui haveno caminado dreto a essi, e sono arivade le zente da piedi del Contestabele, e drio essi quelli di monsignor di Vandomo; et nostri nimisi vedando che nui andavamo drieto a essi, si sono fermadi, e da questa hora ha comenzà l' artellaria a tirar da una banda e da l' altra. Nui caminavamo sempre a essi, et essi fermadi ne aspetavano; et io ve asecurò, madama, che la nostra artellaria ha meravigliosamente ben operà el so' mestier, perchè senza niente affermarse, da poi che nui havemo aproximà i nostri nimisi, i hanno comenzà a pensar de tirarsi, e cussì quelli retirandosi in ordine, et nui da poi li havemo seguito, di tal sorte che li havemo cazadi in gran desordine de dentro Valentiana, et li è stà bisogno de trovar la ditta terra, perchè non ge ne saria algun scapolà, visto il gran disordine e la vergognosa fuga che i ha fatto. Tutta vòlta l' è stà preso e desfato molti, de sorte che nui havemo abuto la vitoria, azertandove che per doe lige li havemo donà la caza là dove ne restavano sempre di loro, infina tanto che se sono de tutto messo in fuga; ma si andò si apresso di la terra, che l' execution che si fusse fata senza quella non se haveria possù far. El ve piaserà, madama, farne ringratiar Dio, perchè l' ha ben mostrà che l' ama el vostro humilissimo et obedientissimo fiol Francesco.

*Copia di la letera di monsignor di la Tramoia, scritta a la ditta illustrissima Madama, in francese, e traduta in volgar.*

Madama, me recomando tanto et si humelmente quanto posso far a la vostra bona gratia. Madama, el ve piaserà intender che 'l Re ha trovà ozi tutta la posanza del re Catholico a la campagna, et ve azerto, Madama, che mai principe o gran capitano di gente d' arme, nè altri non ha mostrà far sì ben tutti li officii tanto, per quel che ge tochè al fatto de la guera quanto l' ha fatto. L' à parlà a le so' gente, de